

隨

園

詩

話

隨園詩話卷十一

倉山居士著

古陶太尉歐陽少師之母俱以教子貴顯名傳千古然
兩母之著述不傳卽宣文夫人講解經義幾與孔子並
稱而吟咏亦無聞焉近惟畢太夫人兼而有之夫人名
藻字于湘印江令笠亭先生之女余同徵友少儀觀察
之妹也偶咏梅云出身首荷東皇賜點額親添帝女髮
首句本出無心未幾秋帆尙書果殿試第一繼王沂公
而起吉人之詞便成詩講事亦奇矣太夫人雖在閨閣
而通達政體尙書出撫陝西太夫人作詩箴之云讀書

裕經綸學古法政治功業與文章斯道非有二汝宦久
秦中滄膺封圻寄仰沐 聖主慈寵命九重責日夕爲
汝祈冰淵慎惕屬譬諸構榱材斷小則恐敝又如任載
車失誠則懼躓捫心五夜慙報荅奚所自我聞經籍才
持重戒輕易教勅無煩苛廉察無猥細勿膠柱糾纏勿
模稜附麗端已屬清操儉德風下位大法則小廉積誠
以去僞西土民氣淳質樸解糜費豐鎬有遺音人文鬱
炳蔚况迨邇治隆陶鈞綜萬類民力久普存愛養在大
吏潤澤因時宜撙節善調理古人樹聲名根柢性情地
一一踐履真實心見實事千秋照汗青今古合符契不

負平生學不存温飽志上酬
高厚恩下爲家門庇我
家祖德詒箕裘罔或墜痛汝早失怙遺教幸勿棄喫我
就衰年垂老筋力瘁曳杖看飛雲目斷秦山翠讀其詩
可謂訓詞深厚不減顏家庭諾未幾太夫人就養官署
一路關心訪察政聲聞長安父老俱稱尙書之賢太夫
人喜抵署又賦詩曰驂駢乍解路三千風物琴川慰眼
前到處聽來人語好頻年豐樂使君賢連朝話舊到更
深不盡婁江望遠心莫怪老人添白髮兒童幾輩換鄉
音周遭竹嶼與花潭檻外雲光映翠嵐儘有瑣窓詩料
在不須回首憶江南太夫人受封極品考終官署庚子

上巡江浙尚書居憂里門請子行在具陳母氏賢行
上賜經訓克家四字尚書建樓于壘嚴別業以奉宸
章當世榮之有培遠堂詩集行世

培遠堂集中美不勝收摘其尤者五古如靈巖山館夜
坐云圓景下絕壁山館忽已暝石磴靜張琴雪泉清淪
茗不知夜已深月上青松頂五律如正月十二夜云銀
缸暗畫堂坐數漏偏長雁影半墻月鷄聲萬瓦霜夜吟
多遺興春夢不離鄉庭下微風起梅花入幕香落葉云
微霜零木葉秋氣乍蕭森亂逐西風下多隨涼月
窻延皎月苦磴失層陰偶爾閑立平林

如小園云小園半畝寄西城每到春深信有情花裡簾
櫺晴放燕柳邊樓閣曉聞鶯漢書舊讀文猶熟晉帖初
臨手尚生自笑爭心未忘閒招鄰女對棋枰七絕如
探梅云光福寺前日欲曛上陽村外望細縷千林萬壑
浩無際不辨湖光與白雲春殘云斐几熏鑪百衲琴綠
陰門巷晝沉沉春來小苑無人掃花落窗前一寸深松
徑云曲徑彎環石級高滿亭山色綠周遭松風似厭泉
聲小自寫雲門百尺濤五排如雁字云一片雲藍紙鴻
文絕點瑕禽經殊古雅初樹等紛拏每作纏聯起何曾
叙次差銜蘆如運筆游霧類塗鴉凡鳥徒貽詞家鷄詎

用誇緘情來塞北傳信向天涯四出驚風急低橫遠岫
遊諧聲呼伴侶破體遇弓韞行斷疑從缺書空黠不加
竒姿多縹緲取勢故欹斜翰停擒藻臨池戲割沙鵝
羣猶遜巧鳳策足聯華水映騰清稿烟籠護碧紗按天
才不愧逸興寄雲霞五言絕如雨夜云向晚花冥冥獨
坐理琴譜一縷茶烟生疎簾散春雨六言絕如夏日作
云撥火鑪香颺來卷簾涼燕飛去吳門六月猶寒雨在
江南何處皆有清微淡遠之音真合作也其他名句五
言如望華云日生常夜半雲到祇山腰嘗新茶云未乾
春露氣猶帶曉雲香虎邱云隔花皆有閣入寺始知山

江村寓目云山吞將落日風抵欲來潮七言如梅花云
獨與白雲如有約遙疑積雪亦生香聞蟲云花徑雨過
蒼乍冷豆棚風定月初明野望云雨餘霜葉紅于染風
定炊烟白欲疑靈巖懷古云香徑花開人去後屨廊風
響月明中登登觀樓云積雪明多能淡日遠山寒極不
生烟

仁和沈椒園庭芳查聲山學士外孫也其尊甫麟洲先
生宰文昌被累戍寧夏母查太淑人留居嘉善不從行
椒園每歲南北省親極行路之苦有詩云秋生紅豆辭
南國春到青銅赴朔方青銅者寧夏山名又雲影有心

隨望眼淚痕和絨綻征衣爲厲樊榭孝廉所賞沈歿後
張少儀有詩哭之云塞上草枯雙淚白瀛州雲淨一襟
清草枯用裴子野事蓋紀實也觀察尊甫笠亭先生宰
印江與沈全成觀察徒跣萬里號呼求救卒獲安全嗚
呼三君皆與余同舉詞科而沈張兩觀察又同舉詩社
十李玉洲先生家往來尤狎今皆先後化去追思六十
年中升沉聚散音塵若夢可爲於邑張母顧恭人若憲
卽畢太夫人母也有挹翠閣集與武林林以寧顧妣齊
名隨官牂牁卒于官所太夫人有得黔中信二首最悽
惻詩云黔中驛使到腸斷血沾襟絕域懷歸意頻年憶

女心不曾虛藥物猶爲寄華簪悽絕離亭語迢遙遂至
今官舍千山外飄飄丹旆懸望雲空白髮繞膝待黃泉
猶有清吟在應教彤管傳阿兄歸口近負土在明年其
後尙書迎養秦關少儀自滇中解組來署白頭兄妹唱
和終朝太夫人又作云千里迢遙客乍回相逢歲盡笑
眉開廿年髮逐梅花白一夜春隨爆竹來誰料異鄉逢
雁序細談舊事劃髓灰殷勤傳語司更者漏箭城頭莫
浪催

吳中詩學婁東爲盛二百年來前有鳳洲繼有梅村今
繼之者其身山尙書乎過吳祭酒舊邗詩云我是婁東

吟社容辦香私淑不勝情其以兩公自命可知然兩公
僅有文學而無功勳則尙書過之遠矣尙書雖擁節鉞
勤王事未嘗一口釋書不觀手披口誦刻苦過于諸生
詩編三十二卷曰靈巖山人詩集靈巖者尙書早歲讀
書地也

蔣用菴有句云花以春秋分早晚天才命各升沉斯
言是也然有才無命終不能展布經綸徐英公遺將必
用方面大耳者曰取彼福力成我功名余按嵩陽毒地
也代公到而龍遠徙樂陽苦泉也房豹臨而味變甘此
其明效也 天子知身山尙書最深故中州奇荒移公

于秦中荆州水災移公于楚省公所到處便能變醢蒼
瘡元氣昭回古今人若合一轍然非有至誠慘怛之懷
亦不能上格天心而下孚民望公有荆州述事詩十首
仁人之言不愧次山春陵行今錄其八云一色長天接
混茫登高無地問蒼蒼突如禍比焚巢慘蠢爾危于破
釜忙海市應開新聚落渚宮重見小滄桑最憐豸繡烏
臺客披髮何由訴大荒魯侍御贊之全家陷沒涼颼日暮暗凄其
棺嬰縱橫滿路岐饑鼠伏倉餐腐粟亂魚吹浪逐浮屍
神燈示現天開網間水患前數日江上時有神燈來往息壤難埋地絕維
那料存亡關片刻萬家骨肉痛流離浪頭高壓望江樓

眷屬都羈水府囚人鬼黃泉爭路出蛟龍白日上城遊
悲哉極日秋爲氣逝者傷心淚迸流不是乘桴便升屋
此生始信卽浮漚生生死死萬情牽騷客酸吟哀郢篇
慈筏津迷登彼岸濫觴勢蹶竟滔天不知骨化泥塗內
祇道身經降割前此去江流分九派魂歸何處識窮泉
雲夢蒼茫八九吞半皆餓口半遊魂鮫綃有淚珠應滴
鰲足無功極恐翻救急城填成死劫劈空刀落得生門
若非 帝力宏慈福十萬蒼靈幾個存 手勅親封遣
上公勸氏堂陞一心通金錢內府催加賑版築冬官記
考工直欲犀然窮問象肯教鶉結哭鴻濛 宵衣五夜

批章奏飢渴真如一已同大工重議築方城免使崑崙
視癸庚涼月千家殘婦淚清霜萬杵役夫聲蟻生漸整
新槐穴虎旅重開舊柳營我有孝侯三尺劍誓將踏浪
斬長鯨江水茫茫烟靄深紙錢吹滿挂楓林寃埋魚腹
彈湘怨哀譜鴻鳴寫楚吟南國鄭圖膏雨遠西風潛髻
鏡霜侵莫嗟病骨支離甚康濟儒生本素心

古名臣共事一方屢唱疊和最爲佳話唐白太傅刺杭
州而元相觀察浙東彼此以詩往來爲昇平盛事近日
秋帆尙書總督兩湖適蒙古惠椿亭中丞來撫湖北致
相得也尙書知余作詩話因寄中丞詩見示讀之欽爲

名手僅錄其過哈密云西扼雄關第一區鞭絲遙指認
伊吾當年雁磧勞戎馬此日人烟又版圖路向車師雲
黯淡天連吐谷雪糝糊寒威陣陣催征騎不問付鑿尙
有無過潼關云百二秦關萬古雄片帆黃水渡西風馬
嘶沙岸寒濤外人倚山城夕照中眼界一時窮古磧爪
痕三度笑飛鴻余自湟中往返並此凡三次來朝又入華陰道飽看

霜林幾樹紅果子溝云山勢嶙峋水勢西過溝百里屬
伊犁斷橋積雪迷人迹古澗堆冰碍馬蹄驛騎送迎多
舊雨征衫檢點半春泥數間板閣風燈裏猶有閒情倚
醉題中丞早歲工詩後卽立功青海伊犁及天山南北

凡古之月支鄴善足迹殆徧以故以所見聞彰諸吟咏
宜其沉雄古健足可上凌七子下接黃門矣

中丞詩不專一體亦有清微委婉得中唐神味者如靜
坐云夕陽留戀最高枝簾影垂垂小困時夢裡不忘身
是客鏡中怕見髻如絲黃花秋綻東籬早紫塞人憐北
雁遲悄燕一爐香靜坐篆烟縷縷結相思秋宵云離懷
輕易豈能休打疊新愁換舊愁宿酒大都隨夢醒殘燈
多半爲詩留月扶花影偏憐夜風得棋聲亦帶秋漸覺
宵寒禁不起笑披鶴氅也溫柔過華峯題壁云主人愛
客獨超羣小隊招邀過渭汾三十六峯無所贈隨緣分

與一溪雲題畫云誰家亭子碧山巔
白板橋通屋幾椽
遠樹層層山半角
杖藜人立夕陽天
其他佳句如柳圍
雙沼水花掩一房
山渡口雲連春草
碧波心浪湧夕陽
紅皆可傳也

湖北陳望之方伯爲其年檢討之後人
詩才清妙綽有家風
官楚時適與畢惠兩公共事
可謂天與詩人作合也
第方伯詩余只錄見贈佳句
入三卷中此外未窺全豹
忽有松江廖某持養鶴圖見題
中有方伯一絕云美人自結歲寒盟
入座雲山照眼明
料理鶴糧門盡掩
松花如雨撲簾旌
清脆絕塵嘗鼎一臠亦可知味矣

畢尚書宏獎風流一時學士文人趨之如鶩尚書已刻
黃仲則等八人詩號吳會英才集此外尚有吳下張琦
字映山者亦在幕中生平不甚讀書而工作韻語五言
如咏簾云西北小紅樓湘簾懶上鈎織成千縷恨添得
一層愁夜逗玲瓏月風穿瑣碎秋鑪香隔不斷偷出畫
檐浮七律如登妙高臺云海門中折大江開浩浩風濤
白雪堆樓閣自盤飛鳥上淮徐爭送好山來千秋弔古
空搔首二月懷人正落梅滿池江湖雙白眼與誰同覆
掌中盃夏日感懷云笠澤湖邊是我家釣竿魚艇足生
涯酒泉戀酒不歸去開過幾番茜萼花和人寒食憶舊

云春好因尋方外交小樓高出萬松梢山童遙指向子
笑開士作家如鳥巢六橋春水曲還通載酒舟行夕照
中指點鶯聲好樓閣小桃斜出一枝紅醉筆燈前雜草
行已間遙菴一鷄鳴登床倘有夢歸去好趁半街殘月
明遊霽園二峯巒曲折水淙淙花映藩籬竹映窗最好
小亭東北望青山缺處露秋江五言絕句咏溫泉云欲
訪阿房跡平原烟樹昏楚人一炬後贏得水長溫

映山弟名瑗字慕遠予于吳門見之聽其言令人不衣
自煖詩有家風道中云人家屈曲居山腹客騎盤旋走
樹頭舟中云遠灘沙漲疑分港順水帆飛似逆流廬山

道中云危峯有路人烟少破廟無門水鳥棲黃鶴樓云
巴蜀浪散天欲濕荆襄雲起樹全無題高校書小照云
胭脂山接楚王宮人好先知境不同一閣峇峇闌曲曲
春深門閉百花中

王夢樓從雲南歸嘗誦寶意先生憶舊一絕云鶯花庭
院綺羅年箏語琴心記不全賸有舊時金屈戌畫樓深
鎖五更天

上元有任東白者哭方行之云此日曾無杯酒奠夜臺
應諒故人貧陳古漁爲予誦而傷之未幾任亦死

隱僻之典作詩文者不可用而看詩文者不可不知有

人誦明季楊維斗先生詩曰吾官蘿葡火咳唾地榆生
所用何書余按北史魏昭成皇帝所唾處地皆生榆蘿
葡火不知所出後二十年閔洞微志齊州有人病狂夢
見紅裳女子引入宮中歌曰五靈樓閣曉玲瓏天府由
來是此中惆悵悶懷言不盡一丸蘿葡火吾宮旁一道
士云君犯大麥毒也少女心神小姑脾神知蘿葡制麪
毒故曰火吾宮火者毀也狂者醒而食蘿葡病遂愈夏
醴谷先生督學楚中歲試題象日以殺舜爲事有一生
文云象不徒殺之以水而并殺之以火也不徒殺之于
火而又殺之以酒也幕中閱文者大笑欲批抹而置之

劣等夏公不可曰恐有出處且看作何對法其對比云
舜不得于母而遂不得于父也舜雖不得于弟而幸而
有得于妹也通篇文亦奇警夏公改置一等欲召而問
之而其人已遠出矣余按舜妹敷首與舜相得載帝王
世紀祖君彥機煬帝云蘭陵公主適幸告終不圖敷首
之賢反蒙齊襄之恥是此典六朝人已用之惟以酒殺
舜不知何出又十餘年讀馬驥譯史方知象飲舜以藥
酒見劉向列女傳

許太夫人夜坐云瘦削吟肩詩滿腔春燈獨坐影幢幢
可憐落月橫斜照畫稿分明印紙窗畢太夫人夜坐云

晚睡纔興理鴛鴦侍兒擎到雨前茶愛看寫月桃花影
移上紅窗六扇紗兩題兩詩工力悉敵

嚴東有選宋人萬首絕句採取最博余流覽說邵嫌有
遺珠爲錄數十首以補其缺未及交付東有已亡乃倣
王漁洋池北偶談採宋絕句之例以補之其題其作者
姓名俱不省記也其詩云鎮日尋春不見春芒鞋踏遍
隴頭雲歸來偶過梅花下春在枝頭已十分昨日厨中
乏短供嬌兒啼哭飯籬空阿娘搖手向兒道翁有新詩
上相公十年山館始圍牆竹裡開門笋最長一輛小車
行得過不愁花露濕衣裳行盡疎籬見小橋綠楊深處

有紅蕉分明眼界無分別安置心頭不肯消白頭波上
白頭翁家逐船移浦浦風一尺鱸魚新釣得兒孫吹火
荻蘆中桃花雨過碎紅飛半逐溪流半染泥何處飛來
雙燕子一時含到畫梁西金針刺破南牕紙偷引寒梅
一陣香螻蟻也知春富貴倒拖花片上宮牆白雲山上
白雲泉泉自無心雲自閒何必奔流下山去又添波浪
在人間與郎相期月上時及至月上郎不知妾在平地
見月早郎在深山見月遲風急雲驚雨不成覺來春夢
甚分明當時苦恨銀屏影遮隔仙娥只聽聲寄語沙邊
鷗鷺羣也須從此斷知聞諸公有意除飴黨甲乙推排

恐到君浪靜風平月正中自搖柔櫓駕孤篷若非三萬
六千頃把甚江湖着此翁小桃無主自開花烟草茫茫
帶晚霞幾處敗垣圍故井向來一一是人家校獵山陰
幾度春雕弓羽箭不離身於今老去渾無力看見飛鴻
指示人鳴鶻直上三千尺風緊秋高雪正乾碧眼胡兒
三百騎盡提金勒向雲看花前酒淚臨寒食醉裡回頭
問夕陽不管相思人老盡朝朝容易下西牆桑麻不擾
歲常登邊將無功吏不能四十二年如夢醒春風吹淚
過昭陵繡袖翩翩上翠裯舞姬猶是舊精神座中莫怪
無歡意我與將軍是故人相思無路莫相思風裡楊花

只片時惆悵深閨獨歸客曉鶯啼斷落花枝囑咐花香
莫過牆隔牆人正繡鴛鴦聞香定要停針線繡不成雙
不寄將花飛一片減春光恰逐春風送夕陽莫放珠簾
遮燕子好教含得上雕梁春風永巷閉娉婷長使青樓
悞得名不惜捲簾通一顧怕君著眼未分明南隣北舍
牡丹開年少尋芳日幾回惟有君家老松樹春風來似
未曾來霧裡江山看不真只憑雞犬認前村渡船滿板
霜如雪印我青鞋第一痕牛渚磯邊渺渺秋笛聲吹月
下中流西風不識張京兆畫得蛾眉如許愁未得霜晴
不是晴霜晴無復點雲生鷺鷥不遣魚驚散移脚惟愁

水作聲竹裡茅茨竹外溪粼粼白日護魚磯想因日日
來垂釣石上蓑衣不帶歸春山靈草百花香誰識仙家
日月長滿院莓苔綠陰匝棋聲何處隔官牆田家汨汨
水流渾一樹高花明遠村雲意不知殘照好却將微雨
送黃昏小白長紅又滿枝築毬場外獨支頤春風自是
人間客主張繁華得幾時月團新碾淪花甕飲罷呼兒
課楚詞風定小軒無落葉青蟲相對吐秋絲夜涼吹笛
千山月路暗迷人百種花碁罷不知人換世酒闌無奈
客思家胡虜安知鼎重輕指蹤先自漢公卿襄陽耆舊
惟龐老受禪碑中無姓名欲挂衣冠神武門先尋水竹

渭南村却將舊斬樓蘭劍買得黃牛教子孫一年春事
又成空擁鼻微吟半醉中夾道桃花新雨過馬蹄無處
避殘紅簾裡孤燈覺晚遲獨眠留得畫殘眉珊瑚枕上
驚殘夢認得蕭郎馬過時淡黃越紙打殘碑都是先王
御製詩白髮內人含淚讀爲曾親見寫詩時

唐開元之治輔之者朱璟以德姚崇以才張說以文皆
稱賢相 本朝巡撫蘇州者湯潛菴以德宋牧仲以文
皆中州人也近日中州胡雲坡司寇秉臬蘇州繼二公
而起政簡刑清屢開文宴一時名士如平璠海太史顧
星橋進士時時過從余至吳門必招赴會公領尚書後

都中猶寄懷云過江名士久推袁吳下相逢月滿軒
攬文章留舊價倉山著述綜羣言平生契合惟元老半
世栖遲爲壽萱我上燕臺每南望最關情處是隨園後
又寄扈從紀事詩十二首來不作頌揚泛語自出心裁
從園云一望燈光列星斗始知身在五雲邊想見待漏
晨趨身傍九霄之光景策馬上山尋別路忽聞絕壑響
松濤想見熱處冷行不爭衡要之識力至于才過殘月
又新月幾度排班看打圍則又明寫湛露龍光晝日三
接之恩榮焉有札命余和韻余以詩貴清真目所未瞻
身所未到不敢牙牙學語婢作夫人故不敢作也

攜李顧牧雲流寓襄陽一日獨遊隆中憑弔武侯遺跡
避雨臨龍岡見山腰有茅庵一叟出迎風貌奇古正欲
與言則菴側蹲一猛虎顧驚且仆老翁笑曰子無懼此
虎已歸依我作弟子矣且曰知子能詩盍題數言見贈
顧辭以目疾翁取几上芋與食命瞑坐一刻開眼果察
秋毫顧異之卽題石壁云一衣一鉢一軍持雲水天涯
任所之莫笑道人無侶伴新收猛虎作童兒偶向山前
咒毒龍風雷欲拔萬株松須臾明月當空起歸到茅簷
打晚鍾翁留宿菴中臨別曰明年正月上寅日吾開丹
爐與子服一粒體輕成仙勿忘此囑次年及期赴約行

未十里風雪大作山無行徑又恐老翁不在猛虎獨存
悵悵而返後十餘年目漸昏體漸衰悔從前向道之心
不勇又賦詩云老堪嗟駐顏何處覓丹砂老堪惱五官
雖具無一好痼零渾似過時花憔悴不殊霜後草手頻
戰頭屢顛行來蹙蹙足不前自憎容貌改人惡性情偏
吁嗟乎我今八十已如此愁煞蓬萊千歲仙

毛詩伐木章有求其友聲之語杜陵有文章有神之句
余初不信此言後歷名場五十年方知古人非欺我也
戊申八月年家子許香岩告余云其同鄉程菽園明府
宰武進六月望後苦熱移榻桑影山房讀小倉山房詩

而愛之矣夢題後云吟壇斷北及新舊盟主當時讓木
初搏古爲丸知力大愛才若命見心虛仙人偶戲蓬壺
頂下士爭酣墨瀋餘格調不能名一體香山竊比意何
如滿洲詩人法時帆學士與書云自惠小倉山房集一
時都中同人借閱無虛日現在已鈔副本洛陽紙貴索
詩稿者坱集幾不可當可否再惠一部何如外題拙集
後云萬事看如水一情生作春公卿多後輩湖海有幽
人筆陣驅羣段詞鋒怖鬼神莫驚才力猛今世有誰倫
此三人者素不識面皆因詩句流傳牽連而至豈非文
字之緣比骨肉妻孥尤爲真切耶又有皖江魯沂者見

贈云此地在城如在野其人非佛亦非仙却切隨園菽
園名明懷孝感人時帆名式善滿洲人

有僧見阮亭先生自稱應酬之忙頗以爲苦先生戲云
和尚如此煩擾何不出家聞者大笑余按楊誠齋有句
云袈裟未着嫌多事着了袈裟事更多

虞山趙再白孝廉作詩如武侯出師志吞吳魏而氣力
不足摘其中秋呈鄂文端公云樓虛貯月光常滿水澗
涵星影自稀可謂頌揚得體真州朝陽樓云萬重山去
圍如海千里江來折到樓自嘲云名士本來如畫餅古
人原不好真龍又渡江有水立不動天無容七字殊奇

曾爲余誦鄂公未遇時句云一飯便留客得錢仍與人
相公氣局之大早可想見

齊田駢不屑仕宦而家甚富或戲之曰臣隣女貌稱不
嫁行年三十而有七子不嫁則不嫁然而嫁過畢矣今
先生設爲不宦嘗養千鍾不宦則不宦而宦過畢矣孫
芷亭仿其意咏息夫人云無言空有淚兒女聚成行

沈永之與余同榜五十年官雲南驛鹽道乞病歸途中
信來道生一女適余生阿遲念二人俱是么豚暮馮遂
相訂爲婚沈寄詩云天留蔗境與公嘗六十逾三學弄
璋又曰蘭譜同年交最舊錦湖合璧事尤奇未幾沈來

山中云女爲旁妻殷氏所出本籍江寧父某康紹間作
雲南守備僑居滇中年八十餘聞沈失配願以女供箕
帚沈辭年老殷強勸不已問何故曰我本江南人曠慕
現在金陵公南人也以女從公庶幾留江南一脈耳吁
當殷翁起念時豈料真有余之僑居江寧者一段因緣
哉天下事巧湊之奇往往如此爲賦感婚長篇中數句
云果然此老嬉遊處安置他家女外孫萬里合教青鳥
使一函先報白頭人殷夫人號稱國色攜其女來隨園
相婿故又云嬌娃抱出珠相似阿母全來花見羞沈得
詩以示梁瑤峯相公公連讀此二句音較響胡雲坡尙

書在座不覺大笑

金陵太守謝錕抵任時索余對聯余贈云太守風清江
左依然迎謝傅先生來晚山中久已臥袁安陳省齋先
生繼其父署守鎮江余代作對聯云守郡繼先人問江
水長流剩幾個當年父老析薪綿世澤願黃堂少住留
一枝此日甘棠

偶過竹林寺見題壁云曉來一雨動新涼獨展殘編坐
竹房無數風枝墮殘滴紅闌干外卽瀟湘或云此近人
趙魯瞻詩也

李方膺明府善畫梅性傲岸而與余交好歿後其子某

見贈云記得先君交兩友一子才子一梅花殊有風趣
有郭耕禮者嫌其稱父執之字爲不恭余曰仲尼祖述
堯舜子思且字其祖矣何不恭之有

桐城張文和公七十壽辰 上賜對聯云潞國晚年猶
鬢鑠呂端大事不糊塗梁文莊公乞假養親 上賜詩
云翻祝還朝晚卿家慶更深常州陳文恭公某相國挽
聯云執笏無慚真宰相蓋棺還是舊書生

子幼時大母常爲子言大父且釜公性豪俠與沈遜聲
秀才交好秀才中表楊大姑有文君夜奔之事託先祖
爲之道地楊織足夜行不能踰溝先祖助沈爲扶而過

之事發藏匿余家夫姑纖腰美盼吐屬嫺雅夫母亦憐
愛之母家訟于官太守某惡其越禮鬻與駐防旗下大
姑佯狂披髮自啖其溺旗人不能容沈暗遣人買歸終
爲夫婦生一女而亡後閱香祖筆記載此事稱武林女
子王倩玉者蓋卽楊氏諱其姓爲王也其寄沈長相思
一曲云見時羞別時愁百轉千回不自由教奴爭罷休
懶梳頭怕凝眸月光中上小樓思君楓葉秋

戊申過虞山竹橋太史薦士六人孫子瀟長千里云門
前春風其來矣珠箔無人自捲起對酒云黃金能買如
花人不能買取花時春陳聲和西莊草堂云水高帆過

當窓影風起花傳隔岸香偶成云生怕曉風吹絮落願
為殘燭照花眠皆少年求易才也

余不耐學詞嫌其必依譜而填故也然愛人有佳作老
友何獻葵之長郎名承燕者其壽內云紙閣蘆簾借老
欣欣十載於茲算百年在再三分去矣半生辛苦兩箇
同之弄杼秋宵檢書寒夜常伴窓前月半規慚相對把
青雲穩步望了多時今宵喜溢雙眉是三十平頭設悅
期記去年壽我一杯新釀我今壽爾一曲清詞爾本荆
釵我非紉袴風味儒家類若斯還堪笑笑梅花遶屋又
放枝枝春雨云簾外輕寒傍晚多試問鸚哥春色如何

爲言昨夜雨，殘夢紅了庭梅綠。了擔蘿流水茫茫捲逝
波。春事蹉跎，花事蹉跎，尋芳休待楚雲過。放下香螺披
上烟蓑，畱鬚云馬齒頻加。鵬程屢蹶，還容爾面添何物。
丈夫欲表必留鬚，試問那箇些兒沒。鏡多慚染髮，誰
拂鬢。鬢博得羅敷悅，從今但擬學詩人，間吟使好將他
琢。咏眼鏡云：非關四十視茫茫，也欲借君光。自從與子
囊中相處，一鑑休亡。誰爲白眼，誰青眼，相對總無妨。閱
人世上，觀書燈下，只怕心盲吸烟。美人云：吐納櫻唇氛
氳蘭氣，玉纖握處，堪憐脂香粉澤。分外覺清妍，豈是陽
臺行雨。剛來自十二峯邊，闕干外風鬟霧鬢，猶自繞雲

烟流連怎禁得相思暗結閒悶難捐算消遣春愁此最
爲先怪底鴛鴦綉倦停針坐便爾情牽恰喜有知心小
婢一笑遞嬋娟無題云遮遮掩掩心下難拋秋一點微
露鞋尖妾隔珠簾郎聽簾簾垂人遠只道西風吹不捲
風更風流不捲簾兒誓不休記黃仲則有禽言斷句云
誰是哥哥莫喚生疎客尖新至此令人欲笑

皇甫古尊在金陵市上得金字扇一柄乃前朝名妓徐
翩翩所書扇尾署名曰金陵蕩子婦某古尊喜甚求題
於厲太鴻先生得賣花聲一闕云花月秣陵秋十四妝
樓青溪迴抱板橋頭舊日徐娘無覓處芳草生愁金粉

一時休團扇誰留殢人只有小銀鈎句尾可憐書蕩婦
似詠漂流余讀之不覺魂消亦以揮扇士女圖索題先
生爲填南鄉子云思夢髻慵梳鸚鵡驚回依井梧扇影
似人人似月圓初十六盈盈十五餘並蒂點紅蕖更有
關心好句書不用近前頻掩面生疎水院雲廊見也無
心餘未入翰林時彼此相慕未見寄長調四首來其賀
新涼云記向秦淮水問何人小樓吹笛勸人愁死雨皺
嵐皺多偃蹇我與蔣山相似白下柳又添憔悴却到江
山奇絕處遇雙鬢都唱袁才子情至者竟如此 羅衫
團扇傳名字比風流淮南書記蘇州刺史常聽東華故

人說腸斷江南花底何苦較天都人世樓閣虛無平等
看謫塵寰終是神仙耳花落恨莫提起百字令云才人
爲政羨宦成三十居然不朽互聽參觀如善射轉側皆
能入彀游戲奇情循良小傳千里傳人口西清餘子旁
觀且袖雙手底事拋擲西湖勾留南國展放林端牖
六代青山橫淺黛都做袁家新婦酒客清豪名姬窈窕
小令歌紅豆香名艷福幾人兼此消受夢芙蓉云忽拜
魚書貺有十分思憶十分惆悵不曾相識相識如何樣
泛詞源春漲十隊飛仙旗仗情至文生縱編珠組繡排
比亦清曠眼底金剛紛變相問誰能寂坐蓮幢上低

首前賢焉敢角瑜亮幾入憐跌宕難覓酒樓歌舫一卷
新詞待求君按節分遣小紅唱邁陂塘云揀鄉山絕無
佳處躬耕又乏南畝塵容俗狀真難耐待覓灌夫行酒
尋犀首奈泪灑黃壚漸失論文友小人有母但北望京
華徘徊小院寂寞倚南斗 食肉者俊物龕才都有半
是望秋滿柳東塗西抹年華改說甚色絲蘿白牛馬走
約丁字簾前共剪春盤韭故人歸否唱山抹微雲大江
東去準備捉秦九

謂欄泉
同年

乾隆戊辰李君宗典權知甘泉書來道女子王姓者有
事在官可作小星之贈子買舟揚州見此女子觀音菴

與阿母同居年十九風致嫣然任子平視挽衣掠髮了
無忤意欲娶之而以膚色稍次故中止及解纜到蘇州
重遣人相訪則已爲江東小吏所得余爲作滿江紅一
闕云我負卿卿撐船去曉風殘雪曾記得庵門初啟嬋
娟方出玉手自翻紅翠袖粉香聽摸風前頰問姮娥何
事不嬌羞情難說旣已別還相憶重訪舊杳無跡說廬
江小吏公然折得珠落掌中偏不取花看人採方知惜
笑平生雙眼太孤高嗟何益

隨園四面無牆以山勢高低難加磚石故也每至春秋
佳日士女如雲主人亦聽其往來全無遮闌惟綠淨軒

環房二十三間非相識者不能遽到因摘晚唐人詩句
作對聯云放鶴去尋三島客任人來看四時花

舒城沈生本陞字季堂年已艾矣戊申秋以詩求見各
體俱工古風如白石山古栢行等篇詩長不能脩錄五
言如西施洞云香草美人遠春山古洞寒見贈云記吟
詩句從黃口得傍門牆已白頭俱妙餘三首已采入續
同人集中其祖名長祚者康熙間舉鴻博有竹香園集
過友人草堂云春雲遮不盡柳色認君家到逕聽微雨
開門見落花古心微直諒閒語及桑麻飯量年來減村
醪莫更賒哭友云修短難將理問天人間福慧應難全

他生好向空王乞少占才華自永年

張南垣以畫法壘石見者疑爲神工吳梅村黃梨洲皆爲之傳載文集中太倉離齋園爲王麟洲奉常別業園中假山南垣遺製後歸弁山尙書爲奉母地更名靜逸園畢太夫人秋日閒居詩題五律云勝跡留城市幽居得小園吾生澹相寄往事漫追論人憶烏衣舊名憐香草存祇今耽靜逸秋景滿邱樊字摹王內史詩愛鄭都官石色青書幌花陰冷畫闌池魚一二寸庭竹兩三竿于此端居好身閒夢亦安地迥人稀到風清暑罷侵竹簾香細細桐閣綠悄悄隱几時看畫安弦靜譜琴夜涼

明月上掃石坐深林
磴小花枝密廊深書舍藏
有時翻秘帙隨意坐匡牀
詩邁前春橐鑑疑隔夜香
庭前蹲石丈親見歷滄桑

金陵秋試之年上下江名士畢集余止而觴之各有贈
詩約三千餘首其尤佳者粹入續同人集矣尙有斷句
可采者如虞山王陸禔云叢叢著述皆千古草草功名
只十年長洲顧星橋云渡江名士推前輩扶輦門生半
少年王又云休夸翁子乘車日已是懸車十七年三押
年字俱妙金陵管松年云四海文章經口貴百年心事
問花知無錫徐灝云姓氏直疑前代客語言妙是一家

詩青陽程蔚云一將治績乘時著便把塵緣當夢看
以部婁擬泰山人人知其不倫然在部婁私心未嘗不
自喜也秋帆尚書德位兼隆主持風雅枚山澤之癯何
能及萬分之一乃詩人好相提而並論孫淵如太史云
惟有先生與開府許教人吐氣如虹徐朗齋孝廉云弁
山制府倉山叟海內龍門兩扇開

壬戌年余改官外出客送詩者動以王嬙見戲余因口
號云琵琶一曲靖邊塵欲報君恩屢顧身只是內家
妝束改回頭羞見漢宮人後十年再入朝則鳳池諸
客都非舊人又戲吟云曉日曠隴玉殿開一風回首認

蓬萊三千宮女如花貌都是明妃去後來

張文敏公全南華先生上 朝值春雪初霽南華見午
門外簷下冰柱賦七律一章文敏公疑爲宿構南華請
面試文敏出所佩小玉羊爲題南華應聲云宛爾成形
質居然或寢訛方欲續下而 皇上有旨命和湯圓詩
南華在 朝房立進二十四韻警句云甘白俱能受升
沉總不驚文敏嘆服曰三料倉卒開先生猶能自見身
分也爲序其集云春雨看物萬花怒開鬼工鬼斧不可
思議似之者病學之者死

秋帆尙書撫陝時有上元燈詞十首莊重高華是金華

殿上語一時幕中學士文人俱不能和爲錄四章三碧
榭紅闌萬點明戟門蓮漏轉三更交春便抱祈平意不
聽歌聲聽雨聲鼓鈺般地走輕雷寶燄千枝花戲開瞥
見廣場波浪直雙龍爭挾火珠來仙館明輝麗絳霄銅
駝四角綴瓊翹夜長樺燭添寒燄春曉終南雪未消十
年持節駐秦關夢斷蓬瀛供奉班記得披香頻侍宴紅
雲萬朶駕鰲山

裴二知中丞巡撫皖江每至隨園依依不去舉家工琴
閨閣中淡如儒素其子婦沈岫雲能詩著有雙清閣集
途中日暮云薄暮行人倦長途景尙賒條峯疎夕照汾

水散冰花春暖香迎蝶
天空陣起鴉此身圖畫裏
便擬問仙家在滇中
送中丞樞歸云丹旆秋風返
故鄉長途悽惻斷人腸
朝行野霧籠殘月暮宿寒雲掩
夕陽蝴蝶紙錢飄萬里
杜鵑血淚落千行軍民沿路還
私祭豈獨兒孫意慘傷
讀之不特詩筆清新而中丞之惠政在滇亦可想見
余方采閩秀詩公子取其詩見寄而夫人不欲以文翰自矜
公子戲題云偷寄香閨詩冊子粧臺伴問目稍噴亦佳話也
中丞名宗錫山西人韓慕廬尙書雖爲徐健庵司寇所識拔而在朝中立不倚于牛李之黨兩無所附然官爵崇隆終身平善可知

仕途之不須奔競也近今張警堂先生以縣令起家官
至監司皆委懷任運不營求而自得詩才清妙過盧生
廟云快馬衝風急添衣禦曉寒平生無好夢醒眼過邯
鄲其襟懷之淡定可知矣又宜城夜行云夜半張燈起
披衣上馬鞍月明如欲曙風斂不知寒此景人誰見長
途心轉安襄陽舊遊處明日且盤桓劉霞裳秀才出公
門下仿其意作鉛山夜行云車比龕尤仄心閒坐頗安
清冰明似鏡凍月小于丸燈遠知村到更深喚渡難漸
看浮艸白霜重夜將闌可謂工于竊比者矣先生又過
銅雀臺云可憐腸斷分香日輸與開門放婢人使老瞞

在九原爲之汗下先生名銘江西己卯孝廉

金陵張止原居士立身端謹爲秋帆尙書所重以家政託之常臘底冒雨招余遊靈巖山館其襟懷可想舟中誦其春暮書事云山苑濃陰覆綠苔意行敷坐自徘徊池邊柳弱鶯難駐庭畔花殘蝶未回酒盞怕空先料理柴門喜靜且長開人生得喪何須計一任浮雲過眼來步尙書青門柳枝韻云綠烟漠漠裊晴嵐紫陌輕陰月正三怕上樂遊原上望引人離恨到江南居士名復純兼通醫理工賞鑑

壬寅冬余遊雒臯何春巢引見其親家徐湘圃司馬其

人吐氣如虹不可一世家有園亭之勝招致名姝宴飲
竟夜見贈云一病經年喜再生西風吹客過江城虎溪
大笑酬前願雁宕閒遊寄遠情荒徑漫勞攜杖訪傾心
不待整冠迎夜來天際文星聚珠玉驚聞擲地聲颯颯
空林亂葉聲相逢慰我寂寥情多邀紅袖同行酒小摘
寒蔬爲煮羹對月且拚三五夜看花莫問短長更幽懷
萬種愁千斛不遇先生不肖鳴

隨園詩話卷十二

倉山居士著

戴昉讓有句云夜氣壓山低一尺周蓉衣有句云山影壓船春夢重皆妙在可解不可解之間

人人共有之意共見之景一經說出便妙盛復初獨寐云燈盡見窓影酒醒聞笛聲符之恒湖上云漏日松陰薄搖風花影移女子張瑤英偶成云短垣延月早病葉得秋先鄭璣人雪後遊吳山云人來饑鳥散日出凍雲升顧文煒立夏云病骨先愁暑殘花尙戀春女子孫雲鳳巫峽道中云烟瘴寒雲起灘聲驟雨來沈大成登淨

慈寺云花氣隨雙屐湖光納一窻姜西溟野行云橋歌
眠折鞦韆倒坐雙鳧

有全首在人意中者門生蔡家璫舟中云孤客心情急
去旋榜久帶月趨宵征去舟時共來舟語殘夢依稀聽
不明汪舟次田間云小婦扶犁大婦耕隴頭一樹有啼
鶯兒童不解春何在只向遊人多處行此種詩兒童老
嫗都能領畧而竟有學富五車者終身不能道隻字也
他如湯擴祖之事當失路工成拙言到乖時是亦非方
子雲之優孟得時皆貴客英雄見慣亦常人酒常知節
狂言少心不能清亂夢多吳西林之貧士出門非易事

豪門投刺豈初心皆使聞者以人點頭

吾鄉鄭幾尺先生名江康熙戊辰翰林幼孤貧里中有
商人張靜遠者助其讀書先生貌寢眇一目湛深經學
而詩獨風騷自嘲云自號小冠杜子夏人嗤一日江東
王藏花片於書中題云卷裏崔徽帳中李何如通替覓
殷妃

咏雲者吳尺鬼焯有句云蘆花搖雪碍船過雲葉隨風
逐雁飛陳心田寅有句云一雁披霜千樹冷片雲殘日
半山陰嫌飯遲者劉悔菴云冷早秋衣薄天陰午飯遲
顧牧雲云衣輕曉寒逼新濕午炊遲咏新僕者汪舟次

云見事先人往應門答語輕吳野人云長者尊難近新
名荅尚疑四人皆無心之雷同而俱妙又張哲士咏老
僕云曠職身常病應門語每訛亦趣

六合彭厚村家資百萬慷慨好施年六十而家資罄矣
不得已辭家遠出卒於乃弟孝豐署中葛錫亭哭以詩
云頭盈白髮翻爲客手散黃金可築臺又曰俠傳衆口
難爲富患在無錢不認貧真厚村小傳其弟廸菴葛弟
子也葛往訪之贈詩云笑隨童叟來聽政要借雲山去
賦詩在西湖夜望云月光山色靜窓扉夜景空明水四
圍多少漁燈風不定滿湖心裏作螢飛葛詩筆絕佳半

生爲時文所累然高達夫五十吟詩故未遲也

有人畫七八瞽者各執圭璧銅磁書畫等物作張口爭論狀號羣盲評古圖其諂世也深矣劉鳴玉題云耳聾偏要逢人拈足跛轉喜登山滑可惜不逢周師達眼珠个个金篦刮

又有人畫牽車圖將妻子奴婢器具食物盡放車中一枯瘦男子牽長繩背負而走空中一鬼持鞭驅之亦醒世意也余題云人世肩頭各一擔梅花馱過杏花殘暗中何必長鞭打就作神仙嬾亦難

寶意先生有女曰可字長白有才而天啄蒼云昨宵疑

有雨深院久無人題畫云黃雪襪鞋點翠環秋光一抹
上房山采雲飛盡碧天遠半夜月明響珮環寶意編其
詩號曇花一現集

張麟圃計偕入都與某同寓夢至大海四望皆五色牡
丹鸞麟翔躍有女郎容貌絕世袖中出碧玉版如桐圭
曰此女媧箋也求郎題詩張題一絕女曰郎詩固佳未
嫌妾意須倩某郎爲之所云某者卽其全寓友也次早
起行述所夢相全是科張竟落第而某捷南宮矣某所
題僅記三句云泪花逗雨鮫珠死畫屏幾疊扶桑紫
山陰女子陳淑旂晚思云弱質怯春寒名花帶月看惜

花兼惜影不忍倚闌干

余乙卯科試考列前茅其時在帥學使幕中閱卷者邵君昂霄也相遇湖上有所贈云韻到梅花清有骨軟於楊柳怯當風余有知己之感故至今誦之

山陰沈冰壺字清玉有古調獨彈集以新樂府論古事極有見解如辨永王璘之非反李白之受誣作夜郎行雪李贊皇之非黨作崖州行笑隋主誅宇文身死於宇文作南氏怨以何平叔之不父曹瞞爲孝不從司馬爲忠其粉白不離手之說卽梁冀誣李固之胡粉飾貌也人言崔浩毀佛遭禍乃咏崔浩云仙不能救佛豈能阮

尤爲超脫

湯中丞莘來聘湖上云小橋隔岸時通馬細柳如烟不礙鶯江西楊子載偶成云漁燈欲滅見漁火細雨無聲
漆落花

胡偉然釣臺云在昔披裘客浮名著意逃江流日趨下
益見釣臺高錢相人方伯釣臺云圖畫功名安在哉高
風千古一漁臺此情惟有江潮解流到灘前便急回余
過釣臺見石刻林立獨愛此二首

題畫詩最妙者徐文長畫牡丹云毫端頃刻百花開萬
事惟憑酒一杯茅屋半間無住處牡丹猶自起樓臺唐

六如畫山水云領解皇都第一名猖披歸臥舊茅衡立
雖莫笑無餘地萬里江山筆下生余之掃墓杭州也蘇
州陸生鼎畫扇贈云一枝蘭漿鳴頭波兩箇漁翁載酒
過好看舊山似新婦迎門先爲掃雙蛾

詩中用虎點綴者最少吳尊萊有句云樵聲密雲隔虎
跡落花封雪嶠大師有句云殘雪枝頭雪未消熟眠老
虎始伸腰唐人句云夜深童子喚不起猛虎一聲山月
高

崔尙書應階督浙閩自稱研露老人書扇贈歌者櫻桃
云柳顰花嬌已斷魂春風空自與溫存歌筵一曲當年

事猶識金環舊指痕

松江何嘯客有西湖詩四十首或誦二首云秦亭山頭
暖氣勻秦亭山下早梅新嫁郎願嫁秦亭住占得梅花
第一春長短蘭橈拂渚汀聲聲簫鼓集西冷爲誰唱出
桃花曲儘著蕭郎簾外聽

詩改一字界判人天非箇中人不解齊已早梅云前村
深雪裏昨夜幾枝開鄭谷曰改幾字爲一字方是早梅
齊乃下拜某作御溝詩曰此波涵帝澤無處濯塵纓以
示皎然皎然曰波字不佳某怒而去皎然暗書一中字
在手心待之須與其人狂奔而來曰已改波字爲中字

矣皎然出手心示之相與大笑

沈存中云詩徒平正若不出色譬如三館楷書不可謂不端整求其佳處到死無一筆此言是也然求佳句詩便難作戴殿撰有祺句云但得閒身何必隱不耽佳句易成詩

宋人咏五月菊云爲嫌陶令醉來就屈原醒咏十月桃云劉郎再來歲云暮王母一笑天爲春兩用事俱清切近日姜紹渠咏諸葛菜云至味於今思淡泊軍行到處寓農桑

己卯秋陳竹香從都門來寄余長女成姑議婚所議者

曹來殷舍人也誦其句云水連鐵甕無邊白山到金陵
不斷青余極賞之陳以書寄曹曹欣然允諾兩家已有
成說矣適蘇州故人蔣誦先剔剔不已遂定蔣而辭曹
嫁未半年女與婿俱亡數之不可挽也如是曹旋入詞
林

聖人稱詩可以興以其最易感人也王孟端友某在都
娶妾而忘其妻王寄詩云新花枝勝舊花枝從此無心
念別離知否秦淮今夜月有人相對數歸期其人泣下
卽挾妾而歸

杭州汪秋御夫人程慰良咏秧針云陌旁柳線穿難定

水面羅紋刺不禁可謂巧而不織又有句云事從悟後
言皆物詩到工時心更虛真學者之言有二女皆能詩
長女姊和母句云松留石下千年葉雨引池中二寸魚
次女姊云皓日穿窓飛野馬平池貯水數浮魚

王生同太守母夫人楊氏江都人爲昭武將軍諱捷者
之女孫咏棐云游魚浮水聽大鱗出沙行年十九生生
同十四日而亡故生同有十四日兒譜行世

余入學年才十二龔立夫名木者亦髫年同覆試時立
夫著繡領紅袴爲學使王交河先生所呵今五十餘年
矣老而不遇有人傳其看庭桂一首云牡蠣墻陰碧蘚

封連蝮古幹影重重曉風吹過葉微動夜雨漬來香更
濃好就曲欄敷坐具時從幽境策吟筇天香滿院娛清
晝一任泥深斷客踪

余泊高郵邑中詩人孫芳湖沈少岑吳螺峯招遊文遊
臺是東坡莘老少游定國四人遺迹席間沈自誦其春
草云山經燒後痕猶淺雪到消時色已濃余甚賞之屏
上有王樓村詩云落日倒懸雙塔影晚風吹散萬家烟
真臺上光景螺峯云樓村以七律一聯受知於宋商邱
中丞遂聘在門墻列江左十五子中大魁天下詩云尊
中臘酒翻花熟案上春聯帶草書不遇對仗巧耳前輩

之愛才如此十五子中宰相尙書不一而足惟李百藥
一人以諸生終而詩尤超絕

熊觀察學驥字蔗泉自楚中歸兩目盲矣其晉按周旋
較勝有目者居秦淮水閣與余晨夕過從死前半月賦
秦淮雜咏云秦淮三月畫簾開便有遊人打槳來燕子
不歸春又暮幾家閒煞好樓臺笑語勾留畫舫停紅粧
綠鬢影娉婷簾前燈映樓頭月十里人家一畫屏亡後
余哭之哀作輓聯云生祭有祠楚國至今歌善政風騷
無主奉淮那可喪斯人

六合孝廉張廷松清才不壽詩不多而饒有唐意古意

陸園詩話卷之六
云荷葉風香隔水漉吳姬盪槩濕裙紗晚來滿載新蓮
子月上橫塘正到家

金壇虞廣文景星康熙壬辰進士年八十餘與余相過
蘇州詩才清妙都未付梓偶成云貧不賣書留子讀老
猶栽竹與人看將雪論交人尙暖與梅相對我猶肥解
組云人情驗自休官後我意渾如出夢時訓兒云偶然
爲汝父未免愛吾兒

壬戌余與陶西園鏞俱以翰林改官陶先乞病庚午余
亦解組隨園陶與余同踏月云偷得閒身是此宵白門
何處不瓊瑤芒鞋醉踏三更月猶認看華共早朝壬申

余從陝西歸陶方起病赴都見贈云草草銷魂過白門
故人招我住隨園同看昨歲此時雪仍倒空山絮夕尊
竹壓千竿青尖影峯鋪四面白無痕君行萬里詩奇絕
何意重逢一快論余置酒出路上詩相示陶讀至扁鵲
墓云一坏尙起膏肓疾九死難醫嫉妬心不覺淚下詢
其故爲一愛姬被夫人見遂故也余欲安其意適家婢
招兒年將笄矣問肯事陶官人否笑曰諾遂以贈之正
月七日方毓川掌科王孟亭太守朱草衣布衣呂星垣
進士添箱贈枕各賦催粧陶有詩云脫贈臨岐感故人
相攜風雪不嫌貧當他意處無多少未老年華欲仕身

余和云故人臨別最銷魂萬里攜囊襪被身欲折長條
無別物自家山裏一枝春十餘年後陶從山石遷楚中
司馬挈招兒再過隨園則子女成行矣子時行小名佛
保亦能詩聽雨云連朝三日碧苔生疎館蕭條夜氣清
紅燭當筵花拂榻愛聽春雨到天明雨窓云照眼花枝
亞短牆曉看風雨太顛狂生憎簾捲危簷近點點飄來
濺筆床佛保入泮後年二十以瘵疾亡

山東曾南村尙增風貌偉然以庶常改知蕪湖常詩戲
西園云幾載柴桑爲刺史當年元亮是州民因西園居
蕪湖故也同舟訪余白下一路唱和云潮通燕子趨京

口帆帶蛾眉認小姑風微漁火重生燄寺僻鐘聲半代
更皆佳句也後刺郴州署中不戒於火女以救母故與
母俱焚郴人爲立孝女祠南村亦以悖卒

漕帥楊清恪公錫綬德望冠時而詩才清妙夜行云好
風潛入夜明月正當頭字碧兼空濶舟輕足泳遊微涼
雙袖薄小照一螢流此意憑誰識前饒有釣鈎楊村云
微雲不成雨片月復宵明柳外烟無際河邊市有聲飛
流緣漲急氣肅爲秋清咫尺揚村近吾宗有送迎泊北
夏口云舟維涼雨後人坐晚燈初葉濕全低柳波寒不
上魚攬衣嫌葛細得酒愛更餘亦有孰吟客瑤篇孰起

子夕陽云一棹秋風裹行行又夕陽飛還鴉影亂舞罷
柳絲黃客意衍山急帆陰卧水涼何人方獨立覓句向

蒼茫

裴文達公曰修與余同出蔣文恪公門下己未入都過

阜城悅女校書采玉意殊拳拳後乞假歸觀余送行詩

戲云阜陽女兒名采玉當筵一曲歌楊柳今日臨卽負

弩迎可還杜牧尋春否又十年余入都補官襄典試江

南相逢荏平道上見贈云車中遙指影翩翩忽訝相逢

古道邊粗問行藏知大概諦觀顏色勝從前南來我愧

山濤鑑北去君琴祖逃鞭後會分明仍有約歸程期在

暮春天是夜宿旅店見余壁上有詩和其後云漫空飛
絮攪春情十日都無一日晴水斷虹橋迷古渡雲埋雉
堞隱孤城故人已別心猶惜舊壁來看眼忽明我正聳
肩閒覓句不勞津吏遠相迎已卯秋裘又典試江南到
山中爲余誦之

公出使伊犁襄贊軍事在黃制府行臺卽席有作云使
相鈞衡大將旗西來賓閣喜追隨談深席上杯行數坐
久恣聞日過遲任事肩無旁仰處安邊巧是已成時天
兵討叛非勤遠此意須教萬姓知又元旦試筆云年年
染翰揮毫手乍喜金鞭控鐵驄嗚呼以一書生而能走

萬里贊軍機與沈文憲公以詩人而受 帝寵者皆近
今所未有可稱吾榜中得人最多張乖厓不得擅美於
前

盧雅雨先生轉運揚州以漁洋山人自命嘗賦紅橋修
禊四章一時和者千餘人余俱未見而先生原唱余亦
不甚愛誦也及其致仕留別揚州詩竟成絕調真所謂
歡愉之詞難工感愴之言多妙耶其詞曰脫却銀黃敢
自憐不才久任受恩偏齒加孫髡餘三歲歸後歐公又
九年犬馬有情仍戀主參苓無效也憑天養疴得請懸
車日五福誰云尙未全平山迴望更關愁標勝家家醉

墨留十里亭臺通畫舫一年蕭鼓致深秋每看絳雪迎
朱旂轉似青山戀白頭爲報先疇墓田在人生未合死
揚州長河一曲繞柴門荒徑遙憐松菊存從此風波消
宦海始知烟月足家園歲時社集半歌好鄉里筵開鶴
髮尊癡願無多應易遂杖朝還有引年恩嗚呼後公果
將杖朝矣乃竟不得考終余弔之曰潛岳間居竟不終
褚淵高壽真非福列子云當生而生福也當死而死福
也其信然歟

余髫年入泮人來相賀而余不知其何以賀也讀宋人
李昉贈賈黃中童子云見榜不知名字貴登筵未識管

絃歡方知古人措詞之切

聲音不同不但隔州郡並隔古今穀梁云吳謂善伊爲
稻緩淮南人呼母爲社世說王丞相作吳語曰何乃洵
唐韻江淮以韓爲何今皆無此音

偶見坊間俗韻有以真元通庚青者意頗非之及讀三
百篇爽然若失山榛隰苓十真通九青有鳥高飛亦傳
於天彼人之心於何其臻曷予靖之居以凶矜是一先
十一真十蒸俱通也楚辭肇錫余以佳名字余曰靈均
八庚通十真也其他九歌九辨俱九青通文元無怪老
杜與某曹長詩末字韻旁通者六東坡與季長詩汁字

韻旁通者七

余祝彭尚書壽詩七虞內悞用餘字意欲改之後考唐人律詩通韻極多因而中止劉長卿登思禪寺五律東韻也而用松字杜少陵崔氏東山草堂七律真韻也而用芹字蘇頲出塞五律微韻也而用塵字明皇餞王陵巡邊長律魚韻也而用符字李義山屬對最工而押韻頗寬如東冬蕭肴之類律詩中竟時時通用唐人不以爲嫌也

沈總憲近思在都無眷屬項霜泉嘲之云三閭無佛殿一个有毛僧曾觀察之裕性粗豪而屋小暑門曰雨門

東倒西歪屋一個南腔北調人薛徵士雪善醫而性傲
署門曰且喜無人爲狗監不妨喚我作牛醫

同年成衛宗宰南安小婢春桂於後園獲百印文曰忠
孝傳家成題云孔龜張鵲難重覩此石摩挲亦頗宜愧
我平生期許在儘教世守作良規余宰江寧時聘史茗
湄爲記室成識之於署中後爲臺灣司馬史館馮觀察
家相見甚懽秩滿將西渡留別史云卅年舊雨各西東
忽漫相逢大海中自是壯懷同作客不堪哀鬢已成翁
世情轉燭貧交久物態浮雲老眼空他日故園應聚首
一樽相對話松風

寇萊公墓中曰云渡海尺十里過山已萬重後貶雷州
渡海方悟前詩成誠范文正公咏月云已知千里共猶
訝一分虧後終於蔡知政事

姑母嫁沈氏年三十而寡守志母家余幼時卽蒙撫養
凡浣衣盥面事皆依賴於姑姑通文史余讀盤庚大誥
苦齧牙姑爲同讀以助其聲嘗論古人不喜郭巨有詩
責之云孝子虛傳郭巨名承歡不辨重和輕無端枉殺
嬌兒命有食徒傷老母情伯道沉宗因縛樹樂羊罷桐
爲嘗羹忍心自古遭嚴譴天賜黃金事不平余集中有
郭巨埋兒論年十四時所作秉姑訓也

江西帥蘭舉先生名念祖督學浙江一時名宿都入網羅半皆蘇耕餘廣文爲之先容蘇故癸巳進士長於月旦吾鄉名士多出其門惟余年幼未往帥公來時余年十九考古學賦秋水云映河漢而萬象皆虛望遠山而寒烟不起公加歎賞又問國馬公馬何解余對云出自國語註自韋昭至作何解救實不知繳卷時公閱之曰汝輕年能知三馬出處足矣何必再解說乎曰國馬公馬之外尙有父馬汝知之乎曰出史記平準書曰汝能對乎曰可對母牛出易經說卦傳公大喜拔置高等蘇先生聞之招往矜寵以不早識面爲恨先輩之愛才如

此後卽公爲陝西布政使竄死臺上余賦五古哭之未
四句曰青蠅宦海飛白骨沙塲拋何當抱孤琴塞外將
魏招

詩有正喻夾寫似是而非之語最妙王介祉咏鐵馬云
依人簷宇下底作不平鳴香亭阻風云想通天上銀河
易力挽人間風氣難周之桂咏秋暑云旁曉燈偏光燄
夫罷官人更熱中多董曲江太史過十八灘云漫誇利
涉乘風便始信中流立脚難周詩成時適有罷官者言
酷暑入都讀者愈覺其佳

余少時氣盛跳盪爲吾鄉名宿所排惟柴秀才名致遠

號耕南者一見傾心乙卯春柴讀書孤山余寄札云秋
將至矣頗欲掩帷春實佳哉未能端坐餘數行泛論友
朋柴答云赤焯未來青春可愛足下端坐未能僕且嬾
索香熏矣來書惓惓人物此間俗子如春萍何從覓佳
客昨無聊閒步登孤山之巔折梅誰贈可憐可憐某某
輩僕不能定其爲人鄙意以伸翔針芥之言求知己以
君子全交之道待泛交如是而已晴日早來當以此論
質之逋老余愛其措詞雋雅有谷子雲筆札之妙藏篋
中五十餘年耕南夜遊孤山有句云月行疑踏水花坐
當熏衣後客死廣西己亥年余至其家夫人出見白髮

蕭然有陸魯望重過張處士故居光景

丙辰春余欲西行苦無路資適耕南之兄東升就館高
安孳余同至署中贈金一笏裁得裹糧至粵一路舟中
聯句過鄱陽湖野有樹大可蔽牛已朽折委地矣旁一
小枝穿根而出高十丈餘相傳明太祖與陳友諒戰時
此樹代受砲故封爲將軍至今尚有燒灼痕柴首唱云
大樹兵火餘枯根尙委地余續云曾抱紀信忠一死代
漢帝柴云輪困根盤存焦枯枝葉棄余云叢叢莓苔痕
鬱鬱霜露氣柴云祖榦扶桑傾孫枝小龍繼余續云穿
出盤古墳猶作擎雲臂東升歎曰二語險絕可不必續

成矣彼此一笑而罷東升贈余五古僅記二句云浩氣
盤九疑晴襟豁萬谷嗚呼當日無柴君則余何由得見
金公又何由得從粵西至都下哉後戊戌年余往杭州
訪柴鄰人云全家都在廣東東升亡後未曾歸葬余哭
以詩載集中

余弱冠時與王復且卿華爲至交其父星望公官御史
丙辰春余從廣西入都卿華舉浙江鄉試漏盡作家信
報其尊人猶再三道余不置已而同到京師彼此失意
往來更密其大父子堅先生亦以國士相待次年八月
卿華歸娶同騎馬至彰儀門外兩人泣別戊午秋星望

公病篤猶讀余闕墨許爲第一初十日榜發余獲雋而先生卽於是日委化余感生平知己之恩往視含殮顏色慘懷其戚唐某疑余落第再三道屈坐客無不掩口而笑卿華贈余改官云朝士盡將韓愈惜都人爭作李邕看又數年聞其再落第縊死長安余哭以七古一章載集中已亥春余歸杭州訪其墓則四至塹道被勢家侵佔爲告之官而斷還其後人

余六十三歲方生阿遲時家弟春圃觀察在蘇州勾當公事接江寧方伯陶公飛檄文書意頗驚駭拆之但有紅牋十字云令兄隨園先生已得子矣常州趙映川舍

人詩云住問有人馳驛報賀詩經月把杯聽

余弱冠在都卽聞吳江布衣徐靈胎有權奇倜儻之名終不得一見庚寅七月患臂痛乃買舟訪之一見懽然年將八十矣猶談論生風留余小飲贈以良藥門鄰太湖七十二峯招之可到有佳句云一生那有真開口百歲仍多未了緣自題墓門云滿山靈草仙人藥一徑松風處士墳靈胎有戒賭戒酒勸世道情語雖俚恰有意義刺時文云讀書人最不齊爛時文爛如泥國家本爲求才計誰知道變做了欺人技三句承題兩句破題灑尾搖頭便道是聖門高弟可知道三通四史是何等文

章漢祖唐宗是那一朝皇帝案頭放高頭講章店裏買
新科利器讀得來肩背高低口角噓唏甘蔗渣兒嚼了
又嚼有何滋味孤負光陰白日昏迷一世就教他騙得
高官也是百姓朝廷的晦氣

唐當治平時或咏所見曰可惜數枝紅艷好不知今夜
落誰家及世亂矣或咏所見曰無窮紅艷烟塵裏驟馬
分香散入營

廣東稱妓爲老舉人不知其義問土人亦無知者偶閱
唐人北里志方知唐人以老妓爲都知分管諸姬使召
見諸客一席四鑲燭上加倍新郎君更加倍焉有鄭舉

舉者爲都知狀元孫偃頗惑之盧嗣業贈詩云未識都
知面先輸劇罰錢廣東至今有老舉之名殆從此始
謝深甫云詩之爲道標舉性靈發舒懷抱使人易於矜
伐此言是也然如杜審言臨終謂宋之問曰不見替人
久歷公等袁淑自稱已所作詩須以大材進之不爾飛
去言雖夸尙有風趣漢桓帝時馬子侯自謂知音彈陌
上桑左右盡笑而子侯猶搖頭自得則蚩獠太過矣今
之未偕競病而詩狂欲上天者毋乃類是

孫興公說高輔佐如白地光明錦裁爲負版袴雖邊幅
頗濶而全乏剪裁宋詩話云郭功甫如二十四味大排

筵席非不華侈而求其適口者少矣一以衣喻文之以食喻詩作者俱當錄之座右

淮南程氏雖業禹茨甚富而前後有四詩人一風衣名嗣立一夔州名釜一午橋名夔星一魚門名晉芳四人俱與余交而風衣夔州求其詩不得魚門雖呼午橋爲伯父意頗輕之余曰午橋先生古風力弱近體風華不可沒也如看花不果云蠟屐也思新草色病醒偏負曉鶯聲贈僧云樓前常設留賓榻若下多栽獻佛花桐廬云百里烟深因近水一年秋早爲多山皆佳句也

齊武帝于興光樓上施青漆謂之青樓是青樓乃帝王

之居故曹植詩青樓臨大路駱賓王詩大道青樓十二
重言其華也今以妓爲青樓誤矣梁劉邈詩曰倡女不
勝愁結束下青樓殆稱妓居之始

小雅惟桑與梓必恭敬止考上下文並無鄉里之說張
衡南都賦永世克孝懷桑梓焉真人南巡觀舊里焉後
人因之遂以桑梓爲鄉里

朱潛溪曰人皆云陶淵明不肯用劉宋年號故編詩但
書甲子此悞也陶詩中凡十題甲子皆是晉未亡時最
後丙辰安帝尙存瑯琊王未立安得棄晉家年號乎其
自題甲子者猶之今人編年纂詩初無意見

黃魯直詩月黑虎夔藩用少陵誤伐木詩序云有虎知
禁必昏黑搃突夔人屋壁夔者夔州人也魯直以夔字
當窺字解爲益公題跋所譏

郭注爾雅闕逢攝提格未詳司馬貞素隱以爾雅爲近
今所作所記年名不符古鐘鼎從未有以闕逢攝提紀
年者鄭夾漈曰今人編年好用爾雅各甲爲闕逢乙爲
旃蒙是以一元大武爲牛也夫隱語爲胥井逃難之言
豈可施於簡編乎顧寧人有古人不以甲子紀歲之說
又云古人不以王父字爲字按通志歷舉春秋時以王
父字爲字者八十餘條顧最博雅竟不曾見過通志何

耶

吳冠山先生言散體文如圍棋易學而難工駢體文如
象棋難學而易工余謂古詩如象棋近體如圍棋

何南園咏野菊云絕無人處偏逢我不寄籬邊獨羨君
寫野字妙李琴夫咏瓶菊云未許園林終晚節不妨風
雨到重陽寫瓶字妙李又有風定雨絲直五字亦佳

魚門太史云古文有可讀者有可觀者余謂詩亦然有
可讀者有可觀者可觀易可讀難

鮑雅堂之妹詩人步江女也名季姒工吟詩金稼亭贈
云續史正堪兒作伴工吟恰好父爲師

已卯冬余在揚州見門生劉伊有遊平山詩冊作者十
餘人俱押卮韻余獨賞如臯顧秀才駒清響忽傳樓外
笛嚴寒爭避手中卮之句後官湖北歸卜築於如臯百
步余過其居主人感二十年前知己欣然款接宴飲水
窓出新詩相示西湖云白沙堤外盪舟行烟雨空濛盡
不成忽見斜陽照西嶺半峯陰間半峯晴花塢斜連花
港遙夾堤水色淡輕縞外湖艇子裏湖去穿過湖西十
二橋虎邱云片石尙留金虎迹千花都是玉人魂
余過如臯訪管屢水繪園荒草廢池一無陳迹惟敗
壁上有斷句云月因戀客常行緩風爲吹花不忍狂劉

霞裳有句云一片亂紅吹滿地看來最怨是東風正與
此意相反

杭州何春巢年少耳聾而風情獨絕有秦淮竹枝云猩
紅一點着櫻唇淡抹春山黛色勻壓鬢素馨三百朵風
來香撲隔河人遠近聽來笑語聲板橋西畔泛舟行尋
常一柄芭蕉扇搖動春葱便有情蘭橈最是晚來多萬
點紅燈映碧波我已三更鴛夢醒猶聞簾外有笙歌夕
陽兩岸畫樓臺紅藕香中一棹回別有芳心卿不解扁
舟豈爲納涼來

晉卿王百朋先生過李白廟云氣吞高力士眼識郭汾

陽只此十字可以概太白生平

郭明府起元字復堂閩中孝廉受業於蔡聞之宗伯蔡
爲理學名儒而郭以任俠聞蔡有家難郭爲証佐至受
官刑交臂歷指口無二辭後宰盱眙與余同官有客中
秋思一絕云銷魂何處盼仙槎客鬢逢秋白更加遙指
斷橋垂柳岸前年曾宿那人家贈方南堂云一瓢自可
輕千乘三徑還堪抵十洲比舍云薰衣香出紅窻外鬪
草聲喧綠樹邊其母夫人陳玉璫自稱左芬侍史佳句
云欲別難爲別吞聲古渡頭妾心如此水相送下渝州
劉悔菴有句云石交惟舊硯火伴是寒爐陳古漁弔六

朝松云劇憐兒輩不及見真似古人難再生俱有東坡

風味

震襄與其父役于慈湖舟覆江中時當臘月兩人賴衣
裘故浮水不沉有救船至父曰我老矣速救我兒兒曰
不救吾父我不受救父子推讓適又有船來遂得兩全
陶景山明府贈以詩曰本是龍門客龍宮今到來孝慈
應默佑風浪不爲災其孫渙悅亦贈云從今吸盡西江
水吐瀾文章更不同

程魚門覆舟詩原稿寫眼前驚悸情景最真後改本有
意修飾轉不如前今特錄其原作云揚州西去一宵程

小艇無端夜忽傾，制命不煩滄海濶。溲身先試暮流清，
詩書失後無餘本。戚友來時話再生，莫嘆遭逢磨蝎重。
世間風浪幾曾平，客舟猛疾勢如風。南北相持力不同，
絕叫已驚身在水。舉頭猶見月如弓，慈航倏至關天幸。
隻履飄然悟大空。時失去履攬芷褰裳平日願，險隨騷魄
葬珠宮。余賦詩調之云：水經註疏河渠考，此後輸君閱
歷深。

善寫風水之險者，吾鄉賴道程公光鉅。有華陽行云：滔
滔汨汨長江水，扁舟一葉天涯子。船頭船尾白浪高，片
雲黑處狂風起。舟子喧呼語未終，布帆半曳浪澆篷。橈

竿百尺橫斜立欲卧不卧奔濤中濤湧如山高莫比青
山頭落江心裏一傾一仄強撐風欲上船舷見船底小
兒無知向母啼大兒解事欲登堤面面相看心胆折男
號女哭一齊歇翻身撐立喚鄰舟鄰舟早向潮頭沒須
臾岸回風勢順回首驚魂繞一瞬電掣雷轟萬馬驅舉
頭已到華陽鎮華陽已到驚未平老妻尙有念佛聲
金陵張秀才培饒有風貌正月間與畫師鄒若泉來余
心識之亡何又與常君得祿來余轉問可認張某乎已
而知卽前人自慚老眼之昏乃誦劉悔菴詩曰聞行那
可忘攜杖欲揖還愁錯認人

杭州孫中翰傳曾與余三世通家詩才清逸春朝云鶯啼迎曉霽蝶夢怯花寒上已云人臨曲水偏愁雨天惜桃花忽放晴

近人起句之妙者新安張節夜坐云雨霽月忽滿墻陰樹影搖陳月泉舟中云獨起對江月滿船聞睡聲某春早云不待清明近鶯花已自忙三起俱超結句之妙者月中無事立草上一螢飛殷勤語江嶺歸夢莫相妨遠山深樹裏鐘斷有餘聲三結俱超惜忘題目及作者姓名

丁未余遊武夷夜泊江山聞鄰舟有客說鬼口杭音余

喜語怪乃揖而進之其人姓陸名夢熊字瑩若乃吾鄉
詩人也別後蒙寄晚香堂詩二十餘卷曉起見雪云夜
靜無風冷莫支檐前凍雀早應知關心喜見頭番雪掃
逕先扶竹樹枝紅友有情還愛我綠梅無夢亦相思斷
橋久廢衝泥屐欲踏瓊瑤訪莫遲鵝湖寺云地寒花未
放僧樸語無多皆妙

讀詩不讀史便不知作者事何所指李燾長編載宋眞
宗爲李沆還債三十萬故宋人詩云新祠民祭祀舊債
帝償還唐書載王毛仲奏明皇願得宋璟爲客帝許之
故徐騎省贈陳侍郎花燭云坐客亦從天子賜更籌須

爲主人留

高文端公之父嵩瞻都統贈弟斌云與君一世爲兄弟
今日相逢第二場想見勳貴家國爾忘家之義有積翠
軒詩集文端公屬余爲註釋編上下兩卷

雅讓自佳或以詩示仲小海仲曰詩佳矣可惜太甜其
人愕然問故曰有唐氣焉得不甜蔡芷衫好白稱蔡子
以詩示汪用敷汪曰打油詩也蔡怒曰此文選正體何
名打油曰菜子不打油何物打油

前朝說部有俚語可存者如曉學仙者云服藥求長生
莫如孤竹子一食西山微萬古長不死戒谿刻者云俾

門如鼠穴也須留一個若肯堵塞之好處都穿破刺暴
貴者咏鴟吻云而今擡在青雲上忘却當年窰內時嘲
官昏者咏傘云常時撐向馬前去真个有天没日頭刺
好譖人者咏蟬云莫倚高枝縱繁響也應回首顧螻蚋
刺代人劫友者咏金云黃金自有雙南買莫與遊人作

彈丸

元人弔脫脫丞相云百千萬貫猶嫌少堆積黃金北斗
邊可惜大師無脚費不能搬運到黃泉

揚子載漫興云客中忙過曾遊境夢裏常逢未見書郭
麀秀才兒贈云團疑曩昔曾窺處人似生平未見書

耿上舍湘門題素齋舫壁云背郭臨河靜不諱一軒深
築抵山家茶烟出戶常蒙樹池水過籬欲漂花小睡手
中書欲墮半酣窓下字微斜叢蘭不合留香久勾引遊
蜂入幕紗

海寧陳心田員與諸友以禁体咏梅云已看無不憶未
見必先探汪秋白云一枝懷故宅幾度憶前生陳谷湖
云交枝香不斷一白樹難分顧竹坡咏綠梅云窺春自
怯荷衣薄倚竹誰憐翠袖爽俱妙又有梅花宜稱諸咏
夕陽云殘香漠漠山家暝猶作宮人半額黃陳籬云有
客來探門未啟先從鹿眼認瓊枝微雪云料峭與凝天

半黃霏烟漠漠集池塘是梅是雪兩三點飛絮因風想
謝娘枰下玉花底消閒對奕時稜稜石角擁寒枝微風
吹墮兩三朵絕似山人落子時

戊寅二月過代寺覓壁上小幅詩云花下人歸墮女兒
老妻買酒索匙詩爲言昨日花纔放又比去年多幾枝
袞裏香光如更好曉來風雨可能支巾車歸若先三日
飽看還從欲吐時詩尾但書與內子看牡丹不署名姓
或笑其淺率余曰一片性靈恐是名手乃錄囊間人無
知者後二年王孟亭太守來看牡丹談及此詩方知是
國初逸老顧與治所作余曰真真識之不悞王因云

國初前輩不登仕途與老妻相對往往有此清妙之作
因誦吳野人壽內云涼倒邱園二十秋親炊葵藿慰余
愁絕無暇日臨青鏡頻過荒年到白頭海氣荒涼門有
燕溪光搖蕩屋如舟不能沽酒持相祝依舊歸來向爾
謀覺風趣更出顧詩之上

尹文端公曰言者心之聲也古今來未有心不善而詩
能佳者三百篇大半賢人君子之作溯自西漢蘇李五
言下至魏晉六朝唐宋元明所謂大家名家者不一而
足何一非有心胸有性情之君子哉卽其人稍涉詭激
亦不過不矜細行自損名位而已從未有陰賊險狠妨

民病國之人至若唐之蘇渙作賊劉叉攫金羅虬殺妓
須知此種無賴詩本不佳不過附他人以傳耳聖人教
人學詩其效可觀矣余笑問曹操何如公曰使操生治
世原是能臣觀其祭喬太尉贖文姬頗有性情宜其詩
之佳也

余以雍正丁未年入泮今又丁未矣戲傲重赴鹿鳴故
事作重赴泮官詩云記得垂髫泮水遊一時佳話遍杭
州青矜乍蓄心雖喜紅粉爭替臉尙豔蓼裏榮華如頃
刻人間花甲已重周諸公可當同年看替採芹香插白
頭杭州同入學者只鏡瑛沙方伯一人和云歲歲費門

文運開劉郎老去又重來壺中日轉前丁未册上名存
舊秀才兩領青衫真法物一頭白髮笑于鬚平生幾枕
邯鄲夢屈指黃梁第一回此外和者百餘人如毛俟園
廣文云久於館閣推前輩又向宮牆領後生梅衷源云
錦袍笑赴青衿會似把靈光照泮宮盧元珩云子矜一
賦年周甲聖闕重來歲又丁

余不喜時文而平生頗得其力壬寅遊天台渡錢塘江
到客店無舟可僱遇查廣文耕經有赴任船用名紙借
之欣然來見曰向讀先生文登第讓船所以報也余贈
詩云一隻孝廉船肯讓期君還作後來人到新昌邑合

蘇公曠素不相識遣車遠迎供張甚飾余駭然詢其故
如查所語余贈詩云羈旅忽逢傾蓋客文章曾是受知
人蘇宣化孝廉作官有惠政解餉入都後任反其所爲
民苦之余到時適蘇回任邑人爭迎上匾云還我使君
對聯云三春花雨重携鶴百里笙歌早入雲不料新昌
僻縣竟有文人頌揚甚雅

余過處州想遊仙都峯以路遠中止出縣城到黃碧塘
將止宿矣望前村瓦屋翠如隨緩步焉與主人虞姓者
畧通數語卽還寓將弛衣眠聞戶外人聲嗷嗷詢之則
虞氏見余名紙兄弟六七人來問先生可卽袁太史耶

曰然乃手燭上下照詫曰我輩讀太史稿以爲國初人
今年僅花甲是古人復生矣豈容遽去願作地主陪遊
仙都于是少者解帳長者捲席諸奴肩行李相與舁至
其家余留詩謝云我是漁郎無介紹公然三夜宿桃源
遊仙之夢斑竹最佳離天台五十里四面高山亂灘青
樓二十餘家壓山而建中多女郎簪山花浣衣溪口坐
溪石上與語了無驚猜亦不作態楚楚可人釵釧之色
耀入烟雲雅有仙意霞裳悅蔣校書爲留一宿次日天
未明披衣而至云被四面灘聲驚醒余賦詩云茅屋背
山起山峯枕上看飯香人弛擔夢醒客聞瀾花野得真

意竹多生暮寒雨淡蔣家妹歡喜遇劉安

温州雖多佳麗而言語不通有織藤盤者甚明媚彼此
寒暄了不通曉余戲贈云安得巫山置重譯替郎通夢
到陽臺

温州風俗新婚有坐筵之禮余久聞其說壬寅四月到
永嘉次日有王氏娶婦余往觀焉新婦南面坐旁設四
席珠翠照耀分已嫁未嫁爲東西班重門洞開雖素不
識面者聽入平視了無嫌猜心羨其美則直前勸酒女
亦答禮飲畢回敬來客其時向西坐第三位者貌最佳
余不能飲不敢前霞裳欣然揖而酬焉女起立俠拜飲

畢斟酒回敬霞裳一時忘却將酒自飲攬相呼曰此敬
客酒也女大慚媿然而笑卽手授霞裳霞裳得沾美人
餘瀝以爲榮大抵所延皆鄉城粲者不美不請請亦不
肯來也太守鄭公以爲非禮將出示禁之余曰禮從宜
事從俗此亦亡於禮者之禮也乃賦竹枝詞六章有句
云不是月宮無界限嫦娥原許萬人看太守笑曰且留
此陋俗作先生詩料可也詩載集中

雁宕觀音洞最高敞可容千人石坡共三百七十七級
余賈勇登焉相傳嘉靖二十年按察使劉允升偕二女
成仙於此塑像甚美余低徊久之下坡留戀口號云垂

老出仙洞一步一躊躇自知去路有斷然來時無

余遊覽久得人佳句必手錄之過安慶見司獄許健菴

扇上自題云權支薄俸初成閣自愛閒曹好種花到黃

公壚杏花村見陳省齋太守有對云至今村釀黃公酒

依舊花開杜牧詩廬山開先寺見程巨山有對云樹裏

月光才露影山中雲氣不分層小姑山有俞楚江對句

云入寺恍疑雨終宵只覺寒臣山姓程名巖余已
米同年官至少宰

羅浮只華首臺五龍潭數處景尙幽渺其餘如梅花村

冲虛觀平行散漫頗無足觀不知何以洞天福地負此

盛名節相李侍堯勒石云黃土卧黑石此外一無有只

可一回來不堪再回首

遊武夷路過蘇嶺見關廟中公卿題句甚多莊培因太
史云竹林初過雨僧寺乍生涼朱石君侍郎已亥過云
山僧談舊雨使者閱流星癸卯再過云字跡驚分雁參
居竟隔屋蓋第一次與其兄竹君作學使交代第二次
傷竹君之已亡也秦大士學士題云幽境愛耽禪悅永
老僧閱盡使星忙

武夷勝處以第七曲天遊一覽亭爲最寺中揭煉師字
子文者頗能詩留宿一宵誦其自壽云病能自藥容身
健道不人談免俗譏庭柱有對云世間有石皆奴僕天

下無山可弟兄末署毛大周題